

摘藻堂四庫全書薈要

集部

欽定四庫全書薈要

集部

皇清文穎卷三十八

詳校官候選知縣臣吳甸華



欽定四庫全書

纂要卷一萬九千四百三十九

集部

皇清文穎卷三十八

頌

河清頌

有序

勵廷儀



臣聞至誠盡性清寧昭贊化之符大孝格天保佑
協栽培之理故書美堯勲首頌欽明格被史稱姬
德爭傳河洛榮光凡以乾坤一氣天人一心至治
流通上蟠天而下復際地休徵洋溢乾獻瑞而坤

必效珍我

皇上續緒當陽膺圖御宇

聖以繼

聖邁中天復旦之光華安愈求安厯日是誠和之隱念
大綱小紀庶績咸熙遠至邇安百昌皆遂本開誠
布公而服物由孝思錫類以推

恩是以仁義淪浹於肌膚聲教弘敷於寰海諸祥疊至
萬福來同七曜則合璧連珠嘉禾則一莖數穗寶

玉特呈其光彩草木悉獻其珍奇固已備

盛代之嘉徵極史書所未覩矣茲雍正四年十有二月
河清獻瑞爲地則二千餘里爲時則一月有奇綿
亘四省湛然澄清猗與盛哉斯尤曠代所難逢必
待

昌期而後見者也謹按水居五行之先河爲四瀆之
首上通霄漢光啟圖書易乾鑿度云天降嘉應河
水先清拾遺記曰黃河千年一清至聖之君以爲

上瑞臣遐稽史牒上考

天心乃知物以類從祥由德致我

皇上盛德光天達聰明目緝熙居敬宥密單心

主德清矣百工布化承流穆明交勉官方澄敘精白一
心政本清矣直省仰承

聖訓砥節素絲滌慮洗心奉公守法吏治清矣四方幸
際昇平共遊熙皞沐膏詠澤食德飲和民風清矣
是以河伯輸忠陽侯表慶轉黃流之渾濁顯碧水

之澄鮮千年一覩之奇適逢此日天苞地符之盛
併在兩年上以答我

皇上御極以來宵衣旰食勤求上理之純心下以開我
國家億萬斯年累洽重熙之景運詎非

誠孝之感孚神明之默貺哉爾乃

聖心冲穆

睿慮淵深既遣專官敬酬

神貺因虔齋祓昭告

景陵念

先皇啟佑之謨實貽繁祉示盛世持盈之道彌切寅恭

却

朝賀之文廣推仁之澤旣勗以盡心奉職旋錫以加級殊榮大哉

皇恩至哉

天德法乾行而不息叶謙吉以常亨因坎水之呈祥施

巽風而申命

誠孝所格上下同流矣臣快覩殊祥欣霑渥澤拜揚有
願思同擊壤以鳴歡受

寵無功彌覺素餐之滋愧敬上河清之頌少申衢祝之
私頌曰

於赫我

皇參天兩地誠孝作基中和旣致內外寧謐羣生成遂
和氣攸蒸休嘉疊至

日星河嶽一氣陶鈞維

皇建極輔相裁成馨香上格七曜光晶愷澤下漉洪流
載清

載清維何河身允翕二千餘里表裏澄徹竹箭金波桃
花玉液似鏡斯明如泉斯潔

臨淵俯矚貝闕珠宮色侔清濟光耀吳淞已周月莢不
改昭融殊祥異瑞特表

堯封

徧彼河源來從西極沙石交流易淤難洌沈玉寧菱桑

乾或鑿清宴嘉符必待

有德

上善若水廣大涵濡含生負氣是毓是噓陶之汰之是
淪是疏

朝廷清明燕及方輿

大鈞無私維德是相

神之悅之致茲靈貺昔指崑崙今觀蓬閬振古希聞八
方同仰

父天母地獄瀆公侯

皇猷允塞靡遠不周崇效早法敦化川流

誠孝所格躋此有由

乃遣幣牲乃嚴齋祓昭告

景陵永懷明發履盛思謙

宸衷彌惕錫福臣工幾康交勅

允矣

聖德邁周超唐清寧永奠億世其昌臣司喉舌志切對

揚拜手敬頌

萬壽無疆

河清頌

有序

蔡世遠

臣聞聖人在上天不愛道地不愛寶是故河出圖
包羲則之以畫卦洛出書大禹則之以叙疇蓋天
地一元之氣分而爲陰陽播而爲五行五行之生
以水爲先而四瀆之水以河爲大嘉祥駢臻兆自
河洛理固然也欽惟我

皇上四德根心五氣順布孝以事

親本愛敬之心以推暨乎百姓誠以事

天體元善之長以涵濡乎羣生澄敘官方揚清激濁而
百官以治心周部屋愷澤旁敷而萬民以察乃雍
正四年十二月自陝州至徐邳淮揚等處黃河清
二千餘里歷有數旬臣聞陽氣生於冬至而盛於
春清於十二月者陽氣浸盛歲功方成貞元會合
之時也清於豫徐揚兗間者宅土中央萬派同流
四方之所和會也經數旬如一日者

皇上中天之治日新月盛光被彌極也惟誠則明故湛

然澄清惟主靜以立人極故廓然至清仰惟

聖祖仁皇帝深仁厚澤涵育天下六十餘年

皇上丕承而光大之以言乎心則清明在躬以言乎治
則清和咸理觀乎人文以化成故日月五星徵其
應人情以爲田故嘉禾瑞麥發其祥茲又見黃河
之聿清昭

聖人之大瑞天氣感動而地氣應之地氣寧謐而河伯
効靈此三才合撰之至理一德感孚之明驗也乃

天眷彌隆

聖敬日躋羣臣請陞

殿受賀

皇上謙讓弗居謂事

天如事

親受寵若驚敬畏匪懈善則歸

親虔告

景陵恩推臣下交儆懋修詩曰昭事上帝聿懷多福孔

子繫大易之卦曰履信思順是以自天佑之我

皇上乾惕益深位育益弘翼翼謙謙巍巍煌煌所謂多
福而天佑者莫大乎此臣叨侍

禁廷珥筆

起居領

訓周詳受

恩深重欣逢道寶之昭彰竊慕賡歌之盛事謹拜手稽

首而獻頌曰

巍巍

帝德上通穹昊高明博厚誕膺大寶惟德之徵五行順
布川媚岳輝昭回呈露百神受職四靈來遊五緯垂象
萬派安流惟河之清千年罕覲上瑞聿彰光啟宇宙
皇心緝熙雍雍穆穆江漢秋陽以濯以曝至化所孚洪
濶渟泓清且連漪正在嘉平河從西來星宿濯波旣踰
葱嶺積石攸過北繞河湟亘於地軸龍門磊砢浩汭
狀元氣和會誕降嘉祺白魚赤鯉朗映鱗鬣一碧長空

素練成綺陽亨歲成榮光在此貝闕何明珠宮有爛晶
潔瑩輝爽徹霄漢豫徐充揚歷二千里越有數旬其清
未已凡茲臣工歡忭盈廷曰惟我

皇蕩蕩難名自

建極來嘉徵懿鑠是宜致慶聿懷多福惟

帝曰俞

天實貺予予加抑畏永念前謨

皇考陟降在

帝左右乃眷旣渥申以保佑虔告

皇考以彰瑞應篤敘明昭丕承有慶維時臣工肅然敬
聽謙尊而光聖不自聖孝思維則歸善於

親推恩錫類交儆臣隣昔在包羲寶圖聿獻亦越軒轅
魚人來見黃龍螭蜿當舜之時德水現靈禹則覲之我
皇首出邁帝軼王有開必先以有斯祥誰則澄之河伯
呈之河伯則辭匪克爲之曷爲不滓洪鈞是使洪鈞不
居伊誰之司究厥淵微惟

聖成能太極在心卽物卽誠廓然太虛靜正靈瑩孰先
感召天一所生四瀆之長爰効其靈功峻崑崗澤泱寰
瀛稼穡惟寶明德惟馨三事允治萬象光亨於千萬年
永奠清寧

河清頌

有序

鄂爾奇

皇帝御極之四載

德無不被

恩無不周萬類熙熙百靈効順休嘉之應史不勝書乃

睿慮廣淵

宸修益謹至誠無息宵旰乾乾於是復有河清之瑞紀

日則逾三旬紀地則接四省考諸載籍振古希聞

百爾臣工莫不懽忻抃舞咸願稽首

闕庭恭申

慶賀我

皇上執德彌謙宅心加謹却朝賀而弗受普

錫福於臣工大哉

雨露之仁涵濡無外矣臣欣逢上瑞躬被

殊恩洪惟致瑞之由有源有本實由我

皇上鴻圖丕紹以來敷政寧人立綱陳紀無事不以繼

述纘承光大

先猷爲念無刻不以嚴恭寅畏奉若

天道爲心

建極卽歛福之原

大孝乃格

天之本感應之理自然而然是以

聖祖仁皇帝鑒此精誠啟迪

蒼昊錫茲祉福惠我無疆且以福佑

一人者並福我臣民於無旣也臣以史冊所未聞者身

親見之慶幸之情不能自己是以忘其蕪陋拜手
賜言謹作頌辭以獻頌曰

惟昔帝世地平天成修和府事德潤羣生溯彼河源崑
崙是出維禹之功安濶底績榮光四照紀在周年自茲
以後瑞牒希傳

上天降祐篤生

聖祖乃聖乃神光昭萬古我

皇嗣之紹聞繼志

聖德純全誠孝並至

上帝曰俞錫之嘉祥誕膺多福俾熾而昌猗歟

上瑞惟

德是符日月五星合璧連珠瑞玉嘉禾奇徵疊告雨雪

孔時豐年屢兆

上帝曰俞德修益懋宜申命之以昭篤祐丙午之歲月

在嘉平綿延四省匝月河清皤皤黃髮逮於童幼載道
懽呼從前未有雲則縵矣星則燦矣濯彼中流光其爛

矣何其潔歟似雪之瑩何其皎歟似鏡之明凡茲臣庶
僉曰嘉徵乃忭乃舞翔於

帝庭維

皇曰俞來汝臣庶益謹厥修保茲純嘏煌煌

聖訓光於典謨上超周漢遠邁唐虞微臣作頌敬效嵩

呼億萬斯年式鞏

皇圖

河清頌

有序

任蘭枝

皇上御極之四年海宇昇平治功洋溢至誠感召景貺
時昭維十有二月河清告瑞地越數省之遙時歷
三旬之久在廷諸臣踴躍歡忭咸以

聖德宗隆蟠天際地致茲繁祉邁古超今合辭恭請
皇上陞殿受賀

聖心冲穆辭而弗居永念

上天眷佑優崇錫以非常之瑞皆以

聖祖仁皇帝功德隆盛致斯積慶之詔爰舉

明禋虔申

昭告

訓諭股肱耳目一德一心夙夜祇承愈深寅畏闡微言
於天人感應之理揚奧義於賞罰曲成之間大哉
皇言典謨同煥矣更以

一人凝庥之至德大布

維皇錫福之弘仁內外臣工普加爵秩

殊恩覃被百爾騰歡爭舒寸管以颺言敬祝無疆之
聖壽臣夙直

內廷尤霑

渥澤近緣使事之竣旋軫趨

朝路出潼關之東澄波入望民居商賈載道歌呼計臣

目擊之區更在陝州之上則知河流澄澈所至呈
祥實合普天率土以同昭並非道里疆界所能限
洵屬生民未有而曠古希聞者也臣竊惟天人之

際呼吸可通我

皇上以睿聖之躬建中和之極諸祥悉致衆善咸臻前
此星辰著應於奎躔嘉穀叢生於

御藉苞符疊啟既有明徵矣茲復河伯效靈澄清告祉
德洋恩普源遠流長上瑞也羣臣願伸賀悃

聖天子讓善弗居昭告

景陵永懷明發至孝也保泰持盈有加勿替幾康交勅
廣勵羣工至敬也

錫福臣僚無間中外堂廉一氣和樂歡忻至仁也純之
不外一誠合之實兼萬善五行順序百穀豐登億
萬斯年清寧永奠蓋誠無心祈福而福應彌隆
大德格

天而

天庥滋至者矣臣欣逢

泰運叨被洪恩敢不勉竭愚忱導揚

盛美以自附於天保卷阿之義衢謠封祝之倫乎用拜

手稽首而陳頌八章其辭曰

於昭

上帝厥命有赫誠感誠應所眷惟德我
皇聖神建其有極用致嘉祥表茲迪吉

嘉祥維何降福孔多七政炳耀寶玉瑞禾奇徵疊至復
驗洪河渾流萬頃忽覲澄波

澄波維何遠近同色鏡納天光泉流玉潔涉彼潼津目
覲瑩澈道里孔長萬民欣悅

渥哉

天既答我太平八方寧謐四海永清福以類從厥象昭明

皇心默感惟秉一誠

誠於奉

天欽崇時憲誠於事

親愼聞儉見

宵旰勤勞如傷在念翼翼小心懋膺

天眷

惟兼衆善乃集衆祥至誠不息悠久無疆

乾行曰健謙尊而光慶歸

聖祖祀典輝煌

大孝深仁永錫爾類雨露涵濡

湛恩汪穢允以說之普天同戴共咏九如嵩呼

萬歲

自茲以往福至如川雨暘時若大有書年金甌永固寶

歷綿延徵臣
颺拜敬頌

堯天

河清頌有序

李 徽

皇帝御極之四年冬十有二月九日陝豫徐淮河清二
千里越五年上月澄澈如前斯久道化成之瑞徵
也用拜手稽首而獻頌曰

聖人在上地平天成五風十雨百瑞俱呈凡此百瑞維
道之貞元氣之會

盛德之亨珠聯璧合七政同行坤輿萬里長河載清昔
在包犧道開龍馬性命源流爛然一寫五位生成至誠

不假獸文鳥跡誰與並者九疇之傳水德而下水德攸
宗長河是也

倬彼雲漢爲天之經星源萬里地緯斯形西南分派道
本坤靈行成九折得一其寧下通溟海上貫天星激濁
揚清視我

帝庭

先儒有言清濁之理清其本然濁爲後起當其濁時清
亦在只及其既清濁非他從過化存神釋回增美於變

時雍昭茲河水

自陝入豫天地之中自徐及淮仁德在東道起於中萬國之通德漸於中四海其同自西自東鏡澈水融轉移造化

天子之功

自復而臨天地之心自臨而泰內陽外陰天地會同道化之深陰陽合德和樂且湛三陽浸長五色其簪決辰清歲以迄於今

天以象告地以情宣銀河在望白玉爲川運符千載義
屬先天因其固有復其自然崑崙伊始邃古而前還淳
返樸億萬斯年

道德仁義王化之原無爲清靜異論之門相彼異論黃
流自吞仰惟

聖學直返靈源陽開陰闔秋肅春溫化濁爲清旋乾轉
坤

一人首出作君作師推誠御宇蕩滌澆漓佑茲

一德振彼四維官方澄叙世教潛移道宗元古化浹
清時

盛德大業日新是期

河清頌有序

周學健

皇帝嗣位四年德協上下

天心克若於是百靈效順乾符坤寶超圖溢牒粵十有
二月黃河清自陝迄徐餘二千里河臣以告僉謂
此萬年瑞宜慶

皇帝廼深原

祖德上崇

天道下懋臣工神明之貺讓勿居也臣謹按乾鑿度天

降嘉應河水先清三日又拾遺記黃河千年一清
至治之世以爲上瑞傳稱堯舜榮光燭河舜受命
設壇河側榮光起亦如之逮成王時河清茲皆至
德光昭太和會合天地交應若符契

國家大澤汪洋遠邁虞周間者七曜九穗嘉祥屢仍天
瑞旣兆地應復出博稽今古卓哉曷克方茲夫平
成績奏夔樂是作允猷翕河周人興頌美盛德詠
泰階史臣職之臣不文謹揆斯義廼獻頌曰

浩浩河流四國之紀振古於斯繫德之竦祇我
皇德如天斯穹自北自南自西自東四海會同
天子之功穆穆

天子

上帝右之

四聖之緒

皇誕受之惟曰懿我後嗣

仁考之似陟降

帝庭用錫繁祉大河汭載流載黃嘉平之月有司入
告厥波惟宅厥色惟碧如鑑如冰如練如拭柱策所聞
千年適獲匪適獲只惟

天降厥美匪降自天

皇實啟之時維嘉哉顧瞻渭汭粵瞻有淮逾二千里亦
孔之皆有鱣有鮪鬐鬣泚泚有藻有荇白石齒齒士曰
猗歟綏爰衆居民曰樂且康我室廬衆惟綏矣澤之舒
矣民胥樂矣澤之博矣疊疊我

皇爲民之則揚清激濁惠此方國

天錫

皇帝璿圖玉策億萬萬年九圍是式官臣拜手

天子聖神

皇曰俞哉

先后德之純施及朕身暨三事大夫莫敢弗欽懋哉惟
勤迺蠲以禋格於

仁考逮茲臣鄰用錫純嘏俾惠我民俾而安而敦俾而

和而平四海永清受

天之成

聖駕東巡

盛京恭謁

祖陵大禮慶成頌

有序

鄂爾泰

皇帝御極之八載歲在癸亥月紀孟秋諏吉日飭乘輿
奉

皇太后東幸

盛京展謁

祖陵禮也先時雨師灑道浹旬優渥從官侍從虎賁羽

林七萃八校之士畢罕旄頭鉤陳壁壘千乘萬騎
之衆夙裝以俟比

大駕行雲開天霽和颺拂旗

皇帝曰惟

天惟

祖宗佑予一人耿耿社哉廼循畿甸出北口抵熱河遂
巡省外藩諸部度白狼踰烏桓橋潢水徑龍沙諸
部君長名王下洎且渠當戶千百爲羣沿道供張

奉迎厥角行負弩矢前驅居環

黃幄宿衛奉觴上

壽進膳獻琛

賜賚所加舞蹈呼嵩之聲殷地徹天聞乎數千里之外
皇帝曰於我

祖宗盛德大業至矣哉自祁姚化所弗暨漢唐威所未
驚我疆我索一尉一候謚如也迺入柳邊迺沿混
同瞻長白之峻極度納綠之蜿蜒谷邃山高水深

土厚扶輿鬱積

王氣攸鍾神臯輿區上應析木形勢龍蟠虎踞揭八荒
而包六合我

太祖

太宗櫛沐風雨規矩乾坤披荆棘刈豺狼畫井里蒐軍
實所爲創業垂統作則萬世者山川城邑悉載赫
聲濯靈土俗儉勤室居朴素有陶唐氏遺風焉

皇帝周覽遐觀喟然動容曰此我朝景亳郊岐也倚那

濬哲之頌生民瓜瓞之歌欽念哉齋心凝神愜聞
僉見廼以九月丙申有事于

永陵越六日壬寅有事于

福陵翼日癸卯有事于

昭陵祠官掌儀太常奉引

皇帝穆穆躬執玉瓚酌秬鬯以灌顯相辟公翼翼陪列
庶司百職踴躍濟濟咸駿奔走執豆籩窮天產與
陸珍緣博施而備物揚燎斯光炳玉燭升香遂瑞

蔚慶雲乘龍

在天髣髴肝蠻九獻具舉百禮是洽迺
御崇政之殿清寧之宮以朝以宴遂下

詔書頒中外

湛恩鴻龐愷澤汪濊留都皤皤黃髮之老扶杖而觀擊
壤歌衢異口同辭贊歎曰盛哉乎斯世自

聖祖東巡以還又數十年而載睹

屬車之清塵也

皇帝曰予一人承丕丕基覲揚

祖宗耿光烈惟祀與我國之大事可勿愆廼修祀典
神示羣望暨功宗元祀書太常者若廟若祠若墓
牲幣酒醴咸秩無文廼纘武功教大閱申以三驅
勒以八陣如山如川有嚴有翼廼整旌旆鳴和鸞
度遼河循山海熙熙融融肅肅雍雍以旋乎

紫微之宮至

太廟蓋自有簡策可紀以來未有祀事光顯合萬國之

懽心極兩間之悅豫如

今日者也臣以奉

命留京不獲與于扈從際此

大禮慶成繁禧總至

天章燦爛日星爲昭臣不敢以弇陋不文黯無紀述臣
惟

上天眷佑我

大清

聖聖相繼累洽重熙薄海內外罔勿率俾自肇造以迄
于茲百二十有餘載矣積厚基崇

謨烈既超邁往古

皇帝以大孝鴻仁作求成孚尤非自古守文之君所能
及卽今恭謁

陵寢至誠至敬上明下察無所不通往來兩京時踰三
月之久天晴日煦氣藹如春和風舒徐榮光煜爚
醴泉膏露隨地滋涌

天心之感格協應旣如此其昭彰臣工景從士馬踴躍
父老欣欣望幸屬國喁喁傾心自

輦轂以至海澱山陬飲和食德若遊華胥人情之愛
戴悅服又如此其廣遠然則致治隆盛固已駕商
戊軼周成追羲軒媲顓昊彼漢代侈言明章過沛
幸宛曾何足以比擬萬一乎哉孝經有言聖人之
德無以加于孝大學有言爲人君止于仁大雅有
言繩其祖武於萬斯年受天之祜

皇帝孝通神明仁被草木太和洋溢萬福攸同臣敬以
卜我

大清億萬年無疆之休也謹稽首頌首而獻頌曰

天作高山曰維長白三江濬源地軸之脊

天眷

大清此維與宅殷土周原是壑是闢迺疆迺場建邦有
奕

天命

太祖載旆秉鉞旣掃輝發爰拔哈達吳喇斯滅葉赫斯
伐莫我敢遏聿造

帝業蕩蕩遼瀋我我宮闕

允文

太宗武烈是承東征北討莫我敢膺松杏麾戈如日泮
永詒謀宏遠大猷允升京邑相望曰盛曰興
赫矣一統普幬八埏駿德鴻功

三后在天

皇帝纘緒昭格有虔曰維舊京

山陵在焉駕言徂東王道平平

廼謁

永陵開運蔥蔥廼謁

福陵天柱隆隆廼謁

昭陵隆業崇崇武庫之劍橋山之弓於穆清廟有恤閔

宮

蕭合羶薌清尊大房以格以享綏我思成叶工祝致告

祀事孔明叶

天錫

皇帝萬壽無疆時雨時暘豐年穰穰

迺坐明堂以臨下土禮儀既備恩澤周溥內自州郡外
及蕃部黃童白叟式歌且舞曰

皇帝孝光紹

列祖

至誠感神自

天祐之川祇岳靈助我孝思

皇帝所居景福維祺自秋徂冬周徧兩畿麗日和風春
臺是躋

春臺是躋普天胥樂順德之孚覃被廣博東鰈西鷄南
交北漢式化從風入息出作曰孝曰仁福祿攸酢

皇帝之孝萬邦是式

皇帝之仁四海秉德

皇帝之福與天無極咸五登三嘉瑞畢集卜祚綿綿時

萬時億

聖駕東巡

盛京恭謁

祖陵大禮慶成頌

有序

史貽直

臣聞物本乎天，人本乎祖。故孝子之事親也，致愛則存，致慈則著。而聖王之御宇也，以義率祖，以仁率親。其在廟也，有日祭、有月祭、有時享、有歲祫，其祭於陵寢也，近者或閱歲一舉，遠者或間世一行。至於朔望節序上食之禮，則掌之祠官，引而近之。

親親之誼也書缺有間矣若夫漢唐諸君謁陵上
食諸儀載在史編可考而知也前代諸儒泥於章
句不能緣情制儀以垂於後或是古非今或穿鑿
傳會名爲聚訟無所取裁洪惟我

朝鍾祥長白源遠流長

列祖

列宗積德累仁經營締造暨乎

世祖受

天明命遂朝六合撫綏萬邦中外一家繼繼承承於今
百年懿休乎史冊所書未之有也伏見我

皇上臨御以來敷政寧人無時不以敬

天法

祖爲心無日不以紹聞衣德爲念

善繼善述丕顯丕承邇者恭謁

園陵特修祀事

鼎湖弓劍塵僊聞愾見之思

原廟衣冠動春露秋霜之慕追惟

世德仰溯

先猷用以見

累朝創業之艱難

列聖貽謀之光大萃萬國之歡心以肅雝顯相

至孝也需敷天之膏澤以覃及中外

至仁也周覽盡桑麻雞犬之俗有以知邠岐之勤儉

王業所由興享王及疆表毳服之倫有以知鎬洛之聲

靈

皇威所由被以視夫揚雄之誇羽獵相如之賦上林安
足以方斯

駿烈媿此

鴻休也哉臣承乏銓衡兼司秋部不獲躬隨

鹵簿廁奉璋虎拜之列葵藿之愛無由自展不揆菲陋
爰拜手稽首而獻頌曰

癸亥之秋七月初吉

皇帝時巡六龍扈蹕豈曰盤游

大禮是秩巍巍濔濔日華雲霓長發其祥有邵家室
鑾輿未發零雨其濛

屬車旣駕皎日麗空油油縉雲習習祥風塞垣迢遞塞
草丰茸先天弗違

帝眷

皇躬

於爍

烈祖肇基億朶

天錫嘉符鵲啣靈果唯

天降命敢不負荷北倚長白南控遼左豈不懷安四方
俟我

洪惟

太祖積德累仁

清雖舊邦其命維新躬擐甲胄漠北無塵維時中原旣
否且屯

帝曰念哉吾矜其民

太宗嗣服輿圖式廓

崇政當陽高山荒作旗列八方雲屯萬幕其時中原愈
削以弱

帝曰時哉惟德勝虐

肆我

世祖壹著戎衣矢無亡鏃

天命有歸

聖祖受之壽考維祺

世宗繼緒海寓恬熙亦越我

皇百祿是宜伊誰之爲

列祖之貽

我

皇大孝孝思維則東望

鼎湖聿懷

祖德栝棧旣陳膺臬旣勅春露秋霜豈惟怵惕繩其

祖武庶幾不忒自朝至是不遑暇食

興京翼翼闔闔宕堯乃陳

法駕乃集百僚乃設九賓乃奏雲韶中外一家莫不來
朝傾誠仰化豐毳輕貂歌風比

舜就日如

堯

在昔

聖祖三謁

園陵我

皇法之是遵是承念茲

神器業業兢兢京邑相望王業所興

列聖在天靈爽式憑桑麻被猷禾稼盈塍億萬斯年大猷允升

中天之盛喜起賡歌際茲

景福是曰太和林無伏莽海不揚波在廷獻

頌雲委肩摩微臣蒙

眷九列婆娑豈不抽思非才則那

彤墀拜手但媿卷阿

右十章五章章十句三章章十二句二章章十
四句

聖駕東巡

盛京恭謁

祖陵大禮慶成頌

有序

彭維新

臣聞德惟仁孝能饗帝而饗親治有本原務盡倫而盡制故愛存慈著已致於祐禘嘗烝而僎見愾聞更求諸陵園寢廟自昔累朝謁祀有舉雖書至若萬國尊親惟

今特盛欽惟我

皇上

道隆繼述

德洽神人

值百年禮樂之興

膺一統書車之盛無逸作所時切民依主善爲師永懷

祖德以

列聖爲

皇天所祐樹億世之規模而

盛京爲主迹所基繫八紘之樞紐協靈辰而告

廟諏吉日以啟行日霽秋旻塵清

御路恭承

慈聖勤定省於

行幃深愜

皇情驗豐登於繡甸周巡紫塞虎衛駢闐簇捧紅雲鵷
行絡繹邊庭之勁部咸稽顙以瞻

天屬國之名王並獻觴而上壽凡夫所覆所載罔不悉
主悉臣遞近

神臯勝彼周原
膺膺頻紆

天賞邁於殷土
芒芒洵山川氣脉之英靈爲風雨陰陽
所和會顒趨

寢廟恭謁

鼎湖儼蓬島之三山
融鴻鈞之一氣
王公卿士駿奔走
以執豆籩綏甸要荒
聆笙鏞而從拜跪
禮超漢制

樂協虞韶我

聖祖巡方展祀以還復睹

曾孫繩武我

憲皇奉

命薦馨而後茲來

孝子升禋

鉅典告成

榮光徧溥推

恩錫類

留京集王會之圖

行慶施仁寰寓躋春臺之樂

孝思標物則覺白山滄海非遙

睿藻煥天章眎研都練京為陋今值一陽來復咸欽

萬乘言旋臣民皆懼忤靡涯

懿美詎名言可罄

臣恭逢

盛舉深愧菲才爰集詩書之辭用效升恒之頌謹拜

手稽首以獻曰

皇天上帝祐我

烈祖丕冒海隅出日綏厥士女用集大命地平

天成表正萬邦永底烝民之生

丕承基緒惟

皇作極亶聰明作

元后兆民允殖勅天之命動惟厥時庶績其凝百志惟

熙

帝德廣運無遠弗届聲教訖於四海安民則惠克寬克仁惟精惟一兢兢業業所其無逸

明德慎罰亮采惠疇敬授人時水火金木土穀惟修四海之內平康正直各設中于乃心歸其有極

政在養民惟民從乂惟

德動

天天休滋至

帝曰欽哉惟時惟幾紹聞衣德言予思日孜孜

三后成功在茲東土若日月之照臨多歷年所戒爾卿士克慎厥猷用奉若于

先王往哉惟休

祇見厥

祖休惕惟厲邦伯師長百執事之人惟恭奉幣八音克諧簫韶九成懋昭

大德至誠感神

紀于太常則亦有熊羆之士不二心之臣同力

王室其克有勲人惟求舊惇宗將禮惟忠惟孝以功作
元祀

青炎肆赦宥過無大保釐東郊鰥寡無蓋時庸展親始
於家邦乃日覲四岳羣牧誕告萬方

侯甸男邦采衛罔不承

德奉

先思孝萬邦作式

一人有慶格於

皇天天惟純佑命惟曰欲至於萬年

右集書辭十章

昊天有成命受言載之維

清緝熙福履綏之有命既集正域彼四方昭茲來許長
發其祥

本支百世以似以續燕及

皇天受

天百祿

世德作求昭哉

嗣服念茲

皇祖錫茲祉福

七月流火零露漙漙卜云其吉爰方啟行六轡耳耳八
鸞璫璫百辟卿士烝烝皇皇

山川悠遠幅員既長無此疆爾界自西徂東昉昉原隰
我稼既同黍稷彧彧麻麥幪幪

洽此四國時邁其邦莫不震疊莫不率從來獻其琛受

小共大共哀時之對不吳不揚

會同有繹弓矢斯張一發五祀是用孝享夙興夜寐式
遄其行

三后在天

繼序思不忘

乃覲于

京旣庶旣繁相彼泉水瞻彼溥原此維與宅大啟爾宇
景員維河奄有九有詒厥

孫謀繩其

祖武克昌厥後有秩斯祜

自古在昔天作高山高山仰止峻極于天作

廟翼翼松栢丸丸穆穆厥聲濯濯厥靈陟降庭止赫赫

明明

於穆

清廟克配彼天

天子穆穆醴假無言享祀芬芬百辟爲憲式禮莫愆樂

具入奏崇牙樹羽籥舞笙鼓旣和且平行我

烈祖

旣優旣渥

德音不已在公載燕孔燕豈弟言旋言歸旣多受祉孝
孫有慶

上帝是祇於萬斯年自今以始

右集詩辭十章

聖駕東巡

盛京恭謁

祖陵大禮慶成頌

有序

裴曰脩

乾隆紀元之八年

上侍

皇太后自京師出古北口詣興都謁我

列祖陵寢猗歟盛哉斯誠鉅典粵維我

皇帝陛下臨御海宇凡所施設爲萬世矩矱尊

祖敬

宗帝者首事夙夜東顧慄乎不敢康茲奉

皇太后旨諏吉啟行肅將祀事遵

聖祖遺軌承

世宗憲皇帝志也

三陵翼然

神其攸宅

上迺升壇薦馨以次告祭備儀備物弗懈益虔灌鬯既

畢褒功勸忠旁逮於從龍之佐維時諸外藩王子
部落駢集踵至臣民億萬萬皆跼瞻

聖容同增感慕禮成

駕興霓旌翠麾日華雲燦鱗次闕徼之上蜿蜒遷迤
駐清蹕於東都

上益周覽從容景與神會穆然遐思畢乎高矚我
祖宗經營締造之跡咸在心目

御正殿受朝

錫昇平之嘉讌

恩綸載馳中外和會迴

鑾道山海關旋

京師是行也逾秋涉冬風日清朗

上召問耆老諮訪土俗

輦路所經普

賜膏澤在行之人均荷

惠賚農樂於野師忘其勞往還數千里如在戶闥臣仰

維我

朝起自東土肇造區夏發祥之始實同邠岐自永清
大定以來又百年於此薄海內外都爲一家

聖聖相承依古無匹

皇帝臨一統車書之會當百年禮樂之期揚烈覲光合
萬國之歡心以事我

皇祖典盛禮崇神人胥慶是宜播之賦詠傳於無窮臣
頃者旣歌詩以獻又竊以固陋之詞不足揚扆

聖德伏惟

皇帝陛下述作協於陰陽動靜侔乎天地與詩書雅頌
所稱美同符合節臣謹掇輯五經成語爲頌十六
章陳之

黼座文章報國臣何敢云顧濡筆屬詞誠懼誠忤臣亦
且自慶其遭逢焉頌曰

帝德廣運繩其

祖武至治馨香承

天之祐禮樂明備惟

帝時舉以致其禋祀俾緝熙於純嘏

念茲

皇祖乃疆乃理東至於海邦畿千里肇十有二州罔不
率俾繼自今文子文孫介以繁祉

皇建其有極萬國咸寧纂乃

祖服與時偕行霜露既降可以升

山陵旂十有二旒錫鸞和鈴

時乘六龍亦右

文母視寒暖之節悉率左右徽柔懿恭德音是茂內平
外成克開厥後

奠高山大川建無窮之基

路寢孔碩

神所憑依至於

寢門外如將見之有孚顙若永言

孝思

誕我祀如何直哉惟清薦用玉豆雕菹潔粢豐盛旣備
乃奏簫韶九成用能協於上下以爲禮之大經

帝省其山駿極於天原田每每王道平平

盛德大業有開必先美哉泱泱乎

君子萬年

禮行于

祖廟濟濟翔翔侯甸男邦采衛具飭衣裳辨色始入觀
國之光載薦其慶俾爾熾而昌

雲上于天零露泥泥燕以示慈惠飲酒樂愷乃命有司
大賚于四海崇德報功貴親而尚齒

渙汗其大號

慶賜遂行百辟卿士公侯干城行爵出祿以莫不增省
囹圄止獄訟刑期于無刑

帝光天之下受小球大球四夷咸賓匪紹匪遊皆再拜
稽首以承

天庥民大和會如川之流

乃武乃文克薦

前烈歲云秋矣習射御角力三驅之餘以數軍實展也
大成

天威不遠顏咫尺

帝庸作歌吐詞爲經對越

在天譎駭有聲文物以紀之與日月合其明丕顯哉丕
承哉永底烝民之生

祭則受福入而振旅其道大光昭茲來許以化成天下

有秩斯祐煦姬覆育萬物爰得我所

山川出雲雨雪霏霏兆於

南郊自

天祐之

聖人至德而風雨節寒暑時冬大有年

大君之宜

順氣成象福祿來爲繼序思不忘

聖敬日躋乃賡載歌無疆之詞

天子當陽

上帝是依

聖駕東巡

盛京恭謁

祖陵大禮慶成頌

有序

王太岳

臣竊惟禘祫之義同於聖揆山原之儀疎於曩作
妥帖藏魄嘉愉降靈焉矣然錫圭授啟魚雅而下
璿階刻壁稽堯泮渙而臨雒汜升中柴望則管燭
張皇展義來蕪則丘陵津逮天衢地輔森景栢之
丸丸星畢雲捎曠原荼之膻膻雖邁邦有赫而造

禰無勤非以率見克配裒敷來孝疏接下武之祺
恢通周監之軌至廼桐闈闢曙飲酎計寮總纁披
寒薦鞠禁媛簫饒焱發憇鄩杜而夸猶廐府雲闐
拜陽平而局縮蓋春華貫縟殊非下鳳之輝解棗
騰鱣劇爽飡鸞之實皆不足以比附

丕朝永世之經依約我

后薦惠之畧伏惟

皇帝陛下升熙握樞受丕出震纘

列聖之釐成造千齡之樂闔純蘊經地良趾欽其凝承

光道馭天神鱗協其控送進反百代之度絜忝而
登黃鍾紆餘後昆之謨中尊而待衢酌荒臣庶妄
洞閔闔以具瞻賢戚楫親徹黃埏而並樹禹金在
鑄往無谿麓之迷舜壁象蠲求有水火之瞻譬之
桑林一注爍濕驟均簡珠肆縣元白各映抑揚萬
畝協于八觀之鳴經緯千流洪於四溟之滙皇乎
負哉可以躡蹠軒庖之場欬吐姚姒之響者矣顧

迺挈器維冲凝旒若慕游神旁周銜慮孤竦曰余
不敢遐譚紹衣博驚荒古也含醇履素咸中遂禴
懿維我

祖厥有成締降在尋人式畀鴻趾瞻念朽索緬言荷薪
皇天后土置余跼蹐之躬高山大川環以饑溺之抱悵
恍翹翹栗栗如也洎夫堯閔三題姬翔八授黃裳
朝委素徽大調謳歆之歸莫辭孟帶之契已登恭
已何象但有晝日之紓百昌遂登亦覺元造之樂

宸儀外睟淵思內邈肇茂緒之所垂嘒靈風于旣衍
茲淪化豈非

宗祏之靈迓其純錫彌儼

庭止之陟且夫軒轅萬品之用基蒞末以揚芳衡從五
緯之文澡璇源而啟瑩是故少典作而高辛昌窮
蟬衍而重華兆僉山祖頊立王勤商遒牒鋪觀左
符若合

國家膺五百之景休乘四七之前會華胥

神母初定祥于倪天白水

真人即叶靈于啖月

肇祖首出

三聖紹興

太祖

太宗丕承丕顯筌宰寄矣馨業綏矣方夫截所裁基規
員展域憺澹人鬼之謀從容戈馬之烈素鱗未躍
連山之歎海重波丹翼初投接地之垂雲五葉麾

斥八極淑清日月之光犇走千靈豁達風雷之氣
旣而大龜告契光宅斯皇鬴肪玉而召鷹揚漂雨
珠而錫粒食蜚孤卓地揭蛇虎以羣翔圖契開天
進魚龍而合負五禮六樂聲光銜燭之門厚利龐
仁根蒂文衢之蔭然後濟景若華之顛重規穹幕
之表襲正陽而號四履廓塤黷而迴六幽砥屬烝
徒共揖羣辟三千長邁鏗鉤不戰之征八百如歸
汗湯不期之會蓋以暘元春之茂施受偃草之羣

順迄我

世祖一戎衣而有之吁其久也然則設都來辟勤懷旅
楹胥寓生民必遵自土良由禮不忘本樂樂自生
仁祖六十年之三駕

憲考十三祀之匪康規勢雖判在懷罔殊矣故曰麗正
之運戴抱而輪重運掌之紀事述而志繼夫進可
以接降原陟嶽之遠躡退可以協墮嶽翁河之邇
猶比于在廟而憑依爲親舉之間歲而大禮不瀆

斯宣詰之所慙慙孝理之所亟亟故廼進禮官按
恒式太卜諏吉罔伯選徒使者先駟名物式序
天子揚鑾太紫之庭指旆中黃之宅皇皇

三陵具禮容而明祀事蓋在昭陽次歲而郊風授衣芒
乎鑠哉夫其靈鼉迅發珥象威夷梯畢罕以高摩
駟虬螭而遐運辰旒乍舉九霄之列缺千撫祫輅
方驩十地之靈隆一簇歲筵豹尾覘景附于樊山
蠓畧雞翹應雄鳴于陳寶醇流鬯漑凍未灑而埃

蠲協氣鵜英漢無章而景湛鈎躔轉衛帷宮殿無
外之家羲御襄征帳殿肅嚮明之理魚旂烏鵠秩
宿序于三階岳運川迴走雲駢于七萃斯則陽開
陰閉不窮操軌之靈臬歛頭蜚莫極扶輪之旅爾
迺戾舊都攬荒作百雉歸然千畝如舊桑麻急急
出湛澌之精神雞犬依依共熙怡之血氣繞雲鬕
于若綬譌号迎釐進霜耆于修幡哢容送躔於是
齊被孔虔質明皆作容衛肆具

幽宮靜嘉三祇奉引八神左右盟奉溪后之盤香擲祝
融之猷觥醪鱗次傾皇澗之溫波泔澹珠璫合甫
田之仁粒金支晁夜緝魚火于重幽玉豆馨晨匹
樵蒸于大昊宏排詆蕩納合體之馨香大聳慄訛
下靡爭之醢假夤儀選而鴛鸕踰穆羽調而龜麟
舞用能襲鴻明于朔拱接雲氣于西徂混江錯綺
載思樂以沖灤白嶽撐霄疊禎氛而律萃羽綴解
華樹輟祝嘏既備褻憲載張坐明堂而渙祥綸輯

伍符而建蕭鉞十倫緝化大澤下于煇胞三表徵
規都肆敝其荼火鳳銜七色散蒼陸之陽暉魚麗
干屯按元娥之陰籙露蕭鬱鬱螫一草一木之驩
日羽芒芒總九地九天之烈閭風寫慶簸太液而
波頽大介揚稜指攬槍而氣警南陽之賚既博司
馬之儀旣閑五材並用盛德貞金木之符六位時
秉妙有體陽纁之總抑又所以式撻武而鞏

皇維籍臚歡而甄

靈貺于斯時也番禺哥椒塗舞月竈納光日際屬燠橫
汾頌義荐麟玉以鐫芳擊筑歌風協龍鈴而布韻
矣然後方神轉轂岳將送旌迴塗乎蕩平憇襟乎
仁壽殊徽自擾驂澤馬以揚鑣神運不勞夾山輿
而結轍珍叢瑰族不加于域大之靈璧月華星匪
震于乾元之色至仁簡簡宮府小大具僚進止之
常至樂夷夷婦子倉箱里閭宴衍之事所謂神規
齊俗妙宰宅虛錘鑪萬有而無憂磐石億祀而莫

紀然後知反本敦憲不更云云之封烈照重芬厥
由翼翼之顯夫揄揚上德以昭聲實于崇今綜纂
見聞以永繩表于遐葉此臣下之義不可損之情
臣誠薄劣生長于懋俗蹈舞于懿則意者廣曜所
被翰豪之纖采皆攄惠凱所宣柯杪之零音並扇
忘其顛愚輒有擬議庶幾堯衢之風比于美芹之
懷裒列丹藻狀乾坤而末由欽挹淵宗顧涓塵而
滋慙臣不任區區吟咏之極敢昧死再拜而獻頌

曰

地無歇流天無孳曜

聖人之生縣輝行浩皇矣

上帝駿惠有

清我

皇時保念

祖兢兢

九極疏局萬域砥道穴蟄淵游諧津罄照于化旣豐在

工載熙我

皇南面綏珮迎釐

天之無爲七曜旋螳淳理楸經五季展義周邦時邁厥
攷維天曾我

列祖莫造莫虔

於皇我

祖造邦東瀛黃鉉下奠紫寓高清道扇風芳氣馳雷霍
人去載胥天推式廓

續祥之趾燿燿

陪都蒼精下緯玉電撫樞

寶胄繇千蘿啗萬惟此

烈光重規沓憲

我

皇念

祖恪止瑄鄉

神祐時饗旣壽永昌

大鳥朱弓天函地襲念此孔修心焉如攝

伐鼓旣坎和鸞旣鷁鉤膺翼翼夙駕洋洋霽杲烜燄協
風珥御

帝邁

舊邦百靈相語

灝瀚龍趨緜嶽鳳翼

神眷佳闈宅斯無極我

皇戾止有愾其心席芳胝履問晷凝襟

羲和振鑣廣輪肅穆芬樹僊僊

金房或或梯霄架拱控極排榜祥熏裂燠藹照麾寒衝
牙輦輶列羽飄蕭籠姬辨禮跨僞鏗磬牲牡既省鬯瓚
既滌享薦

一人息屏百辟

都荔遂芳芳以明德輯賁同琛迺荐嘉璧浚照璫源夤
蔚璇條

龍光時荷享服斯昭

皇之對越慄矣夔夔洞幽屬顯日躍雲綏諒今我聳色
兮我覩匪上斯旁匪堂斯武

神之宴娛聲薌北迓陳寶球圖續綸來下霸旂乍矯
神去夷猶元璣遺耀垂貺

靈脩

烝哉

皇孝蔚矣懋儀本天塽造罄地攸釐乾冒有端坤受有
域我

皇雋祐孰究以極

桓桓虎旅作屏

舊京三樞晏謚八表聲靈墨螭闕庭黃支契軌揮解思
航占觀知頰

震鱗題朔般足巡垆攝提從紀玉燭文明海截丹繩日
躋翠籙有

清兆祀同斯景福

皇清文穎卷三十八

欽定四庫全書

總校官庶吉士 臣張能照

校對官中書 臣張 埏

謄錄監生 臣李青標

欽定四庫全書薈要

集部

皇清文穎卷

三十九
四十

詳校官候選知縣臣吳甸華



欽定四庫全書薈要卷一萬九千四百四十

集部

皇清文頴卷三十九

賦

藉田賦

有序

和親王弘晝



臣聞禮經考索云國以民為本民以食為天故虞

舜命后稷曰播時百穀周公陳無逸曰先知稼穡
之艱難誠所以厚民生固國本也昔漢文帝詔賜
天下田租之半議賑議貸黎民乂安治最近古唐

太宗親祭先農躬御耒耜當時天下無事五穀豐登百姓和樂幾至刑措欽惟我

皇上重農貴粟子惠元元深仁同天至德匝地御極之二年甲辰春仲

躬親藉田率三公九卿秉耒而耕至誠歲事嗣是耕藉之禮每歲舉行至勤且恪用以迓

天貺享

祖考皐人民典鉅慶隆豐年屢兆六府著修和之媿萬

方興盈億之歌唐虞三代之盛未有加於此也謹
拜手稽首繕賦以獻其詞曰

繫稼穡之匪懈兮食乃萬民之天惟我

皇之重農兮稽鉅典於前編敬染盛而飭御耦兮用作
式於八埏乃祇事於九宮之位兮遂

躬耕於千畝之田祥光燦於膏壤兮瑞氣發乎郊鄽萬
姓歡傳兮如百川之朝海千官布列兮等衆星之麗天
懿哉我

皇勤思田功訃吉期兮幸東陸齋三日兮告神農內外
兮清謐上下兮肅雍是日也水漏聲殘東方欲曉南面
凝旒御爐香裊鸞仗兮具陳景鐘兮徐考俄而闔闔啓
寶扇揚六轡齊舉八鸞鳴鏘披綠野兮條風和矚青郊
兮嘉卉芳帷宮啓兮春日麗黛耜具兮稼器詳執洪縻
兮在手御紺轅兮游場四顧兮溝塍砥平三推兮土脈
蘓昌君夫公卿大夫進耕以次或五或九祇肅罔肆庶
人終畝勞酒以賜胥上下以致恭遵禮經而歲事於是

金鞭方輟玉輅遂旋雨廉纖以清路風縹緲而散烟侍
從偕來睹

天顏之有喜馨香上達卜瑞兆於豐年統神人而胥悅
慶福祉之交駢緬夫后稷播種夏禹躬耕取諸豫而順
動應乎乾而時行書傳乃粒之美詩有生民之賡仰惟
我

皇敬誠充盎耒耜

躬親降福孔穰萃九有之歡心展

一人之孝享洵咸五以登三與天參而地兩數耕藉田
兮綏萬屢豐匪且有且兮樂利咸仰又從而獻頌曰我
皇重農弗自暇逸

御藉躬耕身先為率東作西成獲之掙掙晉獻

宗廟享於克一

上元觀燈賦

以時和年豐萬方同樂為韻

和親王弘書

繫陽律之乍轉瞻斗柄之初移勃佳氣之鬱葱正陽春
之屆期解初寒於百室扇條風而和熙快媚景之始陳
惟桃李之先知矧上元之佳節列燈樹於九達布風光
之妍麗歲流翫而忘疲爾乃明昭上帝受福則那雙莖
九穗珍祉駢羅慶民安而物阜悉巷舞而途歌時清兮
太平有象春融兮樂事孔多羅勝新裁人人綵綯鬧蛾

爭要處處肩摩忘箭移於玉漏愛蠟艷於銅荷維時明
月上夜景妍士女集車馬聯搏搏繹繹轟轟闐闐鐵市
銅街鬪銀花之璀璨紅樓翠館映火樹以娉娟簫鼓溢
昇平之響黔黎遊豐樂之年此固合九州而一軌統四
海而皆然者也至若

皇都佳景更為隆豐春先得於萬國

思早沛於

九重比戶受盈寧之錫連閭揚和樂之風故應節而春燈

盛祈年而勝賞同九枝延追古之佳號百葉翻炫今之巧
工或團圞兮似月或蜿蜒兮猶龍撒魚鑰於五夜兮天街
蕩蕩渡星橋於九陌兮人影匆匆若夫居尊臨卑執一御
萬玉燭調兮泰階平東風至兮韶景換人無往兮不和民
有樂兮爭獻張綵架於六宮炯炬輝於三殿鰲山對峙龍
蠟烜其葳蕤鳳閣層開星毬布其燦爛攄愉悅於

宸襟又萬方之所同願夫其夜明似晝月照如霜萬戶
千門幕祥烟之晻藹五光十色閃鶴燄之熒煌畫檻兮

金蟲墜影紗籠兮蠟穗吹香錦繡紛敷儼勝萬花綺谷
笙璫錯奏宛齊瀛海僊鄉夫豈猶人世之可擬而塵埃
之足方也哉然而致斯盛也

一人垂拱九有大同萬物並育百穀屢豐致黎庶於康
阜萃民氣於和雍宜乎登春臺而胥悅同民樂於無窮
爰頌我

皇受天百祿嘉符迭臻金甌永卜慶天地之長春敷陽
和於百族年復年兮化日舒歲復歲兮兆姓樂睹良宵

與勝事快風熙而景淑歡呼抃舞燃長明不盡之燈就
日瞻雲中

萬壽無疆之祝

學問至芻蕘賦

和親王弘晝

為學在乎下問審問貴乎虛心不下問而終成自棄非
虛心而集益不深遠覽遐搜惜寸陰於暇日廣咨博採
彙碩論於冲襟然後獻可替否作礪為霖彼詢於芻蕘
之訓可謂昭往古而耀來今矣原夫日新謂德多識是
貴自用則小矜滿宜汰不臨深以為高敢居約而為泰
迹其過乎自卑正其所以成大是以有而不居謙而不
怵蓋未有自以為是而不受害者粵稽先哲博觀往訓

堯稱克讓舜推好問大禹傳昌言之拜發於至誠孔子
當聞過之時引以自幸夫豈徒高已卑人守一身之獨
學眇聞寡見致四方之令聞也哉爾乃並觀兼聽推誠
布公乃明四目聿達四聰謨猷日陳乎殿陛咨度下逮
於蒿蓬於是朝廷之上數澤之中靡不進讜論竭愚忠
小夫獻一得之善太史陳四方之風詎止邁乞言於憲
老而納明諫於瞽矇於是學既得宗問惟務廣內不懈
兮道積而修來外多聞兮用中而酌兩纖毫不棄如大

海之納細流片善必收等泰山之容土壤敢言之路日
開虛受之衷內朗此

一人所以集慶而為臣民之所共仰者乎

荔枝賦

和親王弘晝

原夫大宛蒲萄上林櫻栗平陸甘瓜江陵紫橘玉井之
雪藕欺霜洛陽之朱櫻耀日鍾山之李大如瓶信都之
棗甜於蜜徵嘉果於羣芳咸應時而垂實乃有林擒為
兄石榴為弟稟乎炎精依乎火帝殼染丹砂衣裁錦帨
角昂見而綻靈葩雲日鏡而流火齊枝懸萬顆等瓊瑤
之紛垂霞麗千房儼珊瑚之交綴繁生閩粵之鄉著美
渝涪之際肇嘉名曰荔枝非凡果之可媿爾其為色也

或稱陳紫或命藍紅始雕青玉旋鏤丹銅瓊膏兮內孕
絳羅兮外蒙赤罽初收脫晶丸於掌上朱囊乍解卸冰
繭於盤中宜乎領狀元之號而膺一品之封若其為香
也貫膚膜徹表裏氤氲可尋掩冉難擬紀江綠之秘芬
傳宋香之旖旎剖殘頰顆溢芳靄而襲人劈破冰肌散
清芬而染指此薰艾納者不足方而含鷄舌者庶可比
至其為味也談香心醉數種涎滋津寒兮似雪膚膩兮
如脂沾唇而甘流僊醴入齒而冷沁華池小核中含快

嚼丁香之實瑩瓢外朗潤同瓊島之芝若夫厥種攸分
品題獨絕龍牙鳳爪之殊雙蒂側生之別楓亭兮自昔
稱奇閩嶠兮於今為烈蔡中郎之譜譽以無雙白香山
之圖誇為第一固宜人人同嗜處處爭傳方之絳雪擬
以神僊詩誦髯蘓狂情饕餮賦成王逸麗句芊綿此紀
芳名於千古而擅嘉實於八埏者也方今

聖澤無方

神功及遠極無外之要荒亦盡歸於圖版藉方物以輸

將詎辭勞於往返

聖心祇惕兮異物弗珍
臣子敬恭兮歲供恐晚
頌玉府兮

殊錫九天褰黃帕兮承

恩上苑咽天漿而飫

德孔深謹獻賦而丹誠
藉展爰為之歌曰嘉實之生依
此芳樹嘉實之來致自

王路欣沐

賜於

九重得分甘於瑤圃看歲獻於炎方慶蒸黎之永附

皇太后萬壽無疆賦

有序以萬壽無疆賦為韻

誠隱郡王允祉

皇上御極之三十九載恭遇

皇太后萬壽花甲一周

臣

祉備位屏藩得颺言

頌祝伏惟

聖母凝庥錫嘏永萬年之歷

睿思弘孝尊親垂百代之光

奉玉食以含飴承露掌開列繽紛之環珮

被山龍而戲綵釣天樂奏來絡繹之車書添籌算於
未央薦兕觥於長樂治道式彰乎

孝德

慈顏並永於坤維率土咸歡普天胥慶臣祉學慚沛獻
欲將介福之詞才謝陳思敢進

母儀之頌惟願流霞絳雪佐玉膳之瓊漿朱草醴泉効椒
宮之靈瑞斑龍捧馭萃松喬期羨而偕稱五福之觴青
鳥銜書合方壺蓬瀛而共貢九如之什臣不勝夫歡忭

愧無能於贊揚謹抒葵忱聊伸嵩祝謹作賦以

獻賦曰

維

聖世之清寧萃禎祥而疊獻既治化之旁敷徵皇極之
克建合大順以致尊親集振古之洪禧躬盛德以崇
聖母立興朝之彝憲我

國家車書同軌大一統以為家

聖祖母六甲甫週協二儀之永健天人咸應以休徵子

孫得伸其至願貢獻踰山海以梯航頌揚極臣民之億
萬伏覩我

皇上純孝性成聖德天授定省晨昏恭勤左右怡

慈顏於椒闈承

歡心於靈囿奉鸞輿益湯沐之里旃裘毳帳貢琛而獻
賁者駢闐導鳳舸臨吳越之邦白叟黃童巷祝而衢歌
者輻輳命駕則豐隆灑途御舟則天吳肅候神祇因
孝德以効靈山川願高呼而獻壽恭惟

皇太后鴻仁溥被渥澤涵濡周藉姜興開天而佐
聖祖任惟姒繼配地以大皇圖茲執徐之紀歲值花甲
之方逾玉殿風和仰卿雲之似蓋金莖日麗浥甘露以
如珠

皇情幸

母后之安康而喜慰

聖懷極家人之禮數以歡娛人親其親人子其子已合
四海以成

一人之孝人知奉親人知克子又即

一人以示百代之模實前古之稀覯允近今之所無於
是南極耀景星光神鳥集瑞鳳翔萐莆自扇蓂莢呈祥
蓋六合含齒戴髮之倫盡荷

推恩之濊渥八極翺動蠕生之屬同涵

錫類之汪洋遡煦育之

洪慈已共黃輿之罔外合羣情為大慶自同

坤德之無疆乃若孟冬屆節乾風初度萬物凝成歲華

貞固方初月之生明喜昌期之適遇大典合萬國之歡
聖孝誠五十而慕

龍文煥彩唱天長地永之詞

螭陛歡騰上日升月恒之句儒林何幸得珥筆以颺言
藩列雖微亦趨庭而學步欣遇

聖明之世欲紀盛而無能敢從簪紱之倫抒微誠而獻
賦

萬壽賦

以一人有慶萬福來同為韻

誠隱郡王允祉

維

昊蒼之無私佑元后之建極六合待其範圍五福由之
敷錫故瑤光華渚受命凝祥日角電樞開天叶吉然稱
祝莫尚陶唐祈年獨侈周歷自今以較前徽

聖皇實為首出蓋久道爰觀乎化成純嘏畢集於盛德
今將賡天保定爾之篇請歷數壽考維祺之實我

國家自

太祖丕基締造至

太宗輿圖式闢

世祖凝鼎命以維新

皇上則大顯承而正域質既擅其神靈學復傳乎精一

聖功乾健

聖德日新隆

兩宮之孝養肅

九廟之明禋光輝被乎四表懷柔遍於百神治本乎黃
唐虞夏道貫乎濂洛關閩乃進石渠之彥天祿之臣闡
圖書之閫奧析謨典之真醇廣教思於宇內布講義於
成均且

宣諭而立訓俾化俗以興仁寰中順則海外來賓覆冒
丕周僉頌

右文天子聲教四訖咸尊

有道聖人至若

神武震乎八區

皇威赫乎九有，弧矢用而市不易肆，撓槍銷而農不更畝。南服廓清，北藩稽首，遂使龍庭毳幕，隸留守之版圖；鼉窟鮫人，增海邦之戶口。擴中外以為家，合垓埏而在宥。

念殊域之傾誠，并帡幪於高厚。

龍旗指瀚海之區，虎旅環陰山之阜。饒歌朱鷺，七萃同聲；旅振白狼，百僚拜手。遐邇同歡，梯航恐後。邁漢唐而

莫京越三五而誰偶猶以保泰在乎持盈勵精逾乎初政憫淮泗之其咨頻省方以申

命躬授平成之規永著河渠之令桑田無恙而允翕可期璧馬不捐而安瀾告慶且

勤昧爽以圖幾

闢明聰而廣聽

延訪下逮於芻蕘垂箴用勵夫諫諍岳牧閩帥俾述職以近

光守宰偏裨得伏蒲而仰

聖憐才則宏開使過之仁獎廉則立寄封疆之柄計典
不煩而吏自整肅軍政預飭而士皆果勁百工有允釐
之休庶績有咸熙之盛至若耕織早繪於

深宮惠澤必周於海甸雨暘未爽桑林之禱默修豐歉
未形常平之儲早辦關隴頒少府之朱提淮揚仰神倉
之白粲課額減而商竈均霑權稅寬而懋遷共勸宿逋
盡免累豁者數十州賜復頻聞歲蠲者數百萬且念深

於欽恤法詳於奏讞巽風掃地幽枉皆春解澤行天生
全無算刑不濫而幾措網雖寬而無玩爽鳩芝秀於園
扉貫索星澄於碧漢此皆

德意浹乎肌膚豈史臣所能紀贊更有盛事足冠古今
鉅典永輝簡牘

巡狩則

定省無違遊豫而花萼必篤闕里之輪奐聿崇先儒之
遺裔畢錄勝國

親修禮敬之儀賢祠

特賜馨香之粟他如東藩請糴轉輸之艘舶聯翩北漢
望哺賑貸之車牛相續沮江平壤欣鼓腹者千村木葉
臨潢慶更生者萬族又若巴渝外徼溪洞殊俗皆百代
之所不臣千祀之所未服

詔書下而永戴

尊親驛使臨而願依覆育即今四十二載巍煥之規已
裕百千萬年清寧之福時則協洽紀歲姑洗律迴花明

瓊島柳拂金臺鶯歌玉樹燕舞瑤堦慶雲屯於六甲佳
氣繞於三台瑞啓當年占為五龍七鳳歡同此日洽於
八埏九垓內則六宮瞻

黼座而上無疆之祝列藩隨

主器而貢

萬壽之杯外則勲臣世胄九棘三槐折衝干城之選鹽
梅舟楫之材八表之車書共集萬方之玉帛偕來海澨
山陬歡呼動地衢歌巷祝頌禱如雷則見夫南極輝於

丙位太乙耀於璿宮仙仗齊而龍墀濟濟鈞天奏而鼉鼓逢逢合宇宙愛戴之情結葱葱之瑞靄聚

天地太和之氣布習習之條風從此醴泉洋溢甘露沖融騶虞馴囿朱鳥棲桐物皆上瑞歲咏屢豐玉燭調而星躔式序金甌固而風俗皆同含哺者忘

帝力珥筆者紀時雍臣敢附九如於雅什繼三祝於華封謹稽首頓首奉觴以進曰

盛德鴻功覆載同符而莫並

大年寶歷乾坤共永於無窮

解愠阜財賦

平郡王福彭

君代天以理物聖出治而憲天至治行乎無事大化著
其誕宣傾者扶滯者出和氣薰蒸乎六宇求有獲欲有
遂休嘉翔洽乎九埏惠薰兮和暢氤氲兮聯繇萬民兮
雍動四野兮殷闐鑿井耕田帝力忘於何有崇墉比櫛
史官誌其有年緬勲華之上理符大造而無偏爾其時
屆中天

聖人在位輯瑞來同共球畢至卿雲兆其紉縵四表蒸

其光被煦煦乎大塊之噫氣既鼓物而無淒油油乎空
穴之娛人亦飲醇而如醉歌於塗舞於巷民十室而九
康積於野登於場禾一莖而六穗家無暑雨之客戶有
珠玉之賜府修事治溥樂利於四民雲爛日華慶平成
乎天地皆斯風之煦嫗代君王而撫字若夫其出自谷
其來自南汎蘭如臭捲霧為嵐若浮若沉乘烟雲為噓
吸如升如降隨光景以沉涵木當之而擢秀草拂之而
成甍凍遇之而融融露值之而湛湛鬱者舒而憂者喜

何愠之難堪至於箕主簸揚物為解渙欣然枯蘓淵然
冰泮吹棘薪兮為凱宣橐籥兮非散從星好兮沛霖導
協氣兮去曠與與翼翼任滿載乎籌車穰穰芄芃溥盈
寧於里閭玉粒兮香浮珠圓兮白粲家安溫飽胥士女
而噢咻戶樂倉箱極千萬而無算珥筆而紀昇平皆斯
風所畢貫信乎列於六子導乎四時著人眇眇鼓物垂
垂理陰變陽佐聖人之經緯迎休導嘏助氣化而敷施
綿綿兮金粟獵獵兮玉枝動物兮不暴宣氣兮咸宜合

四方為薰蒸成兩大之致用因八至以鼓盪識造物之無私我

皇上至德動天休祥福物風聲遠播風教四訖宣仁布義統庶類而甄陶禮備樂和胥羣氛而除祲東極滄海西抵流沙徧六合以攸同上及太清下及太寧盈兩間而遐迄顧大化無外

聖心不居謂予一人順陰陽以調劑合二五為煦噓輦金甌而式固調玉燭以恬如民熙熙而道蕩蕩還醇風

於太初用奠丕基以凝

帝命垂奕禩而有餘頌曰穆

皇風兮化均調四氣兮以淳和而能至兮物靡不親
聖時若兮福物與民周八極兮浩無垠

皇清文頴卷三十九